

Date – 15/01/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Mizoram pumah lirnghing thlen thulha chet lak dan tur enchhinna State Level Mock Exercise on Earthquake Disaster chu vawiin hian neih a ni ang.
2. District Council & Minority Affairs Minister Pu C. Lalsawivungan nimin khan Mizoram State Sports Council in PMJVK kaltlanga basketball court 24 leh volleyball court 18 a sakte a hawng.
3. Prime Minister Narendra Modia chuan buhseng kut Pongal te ang chuan ramchhunga inunauna leh inpumpkhatna a ti nghet a ti
4. India chuan Irana khawsa mek India mi zawng zawngte chu a theih ang anga Iran chhuahsan turin thurawn a pe.

<><><>

STATE LEVEL MOCK EXERCISE

Mizoram pumah lirnghing thlen thulha chet lak dan tur enchhinna State Level Mock Exercise on Earthquake Disaster chu vawiin hian neih a ni dawn a, hemi chungchang hi nimin khan Disaster Management & Rehabilitation Commissioner & Secretary Pu Udit Prakash Rai chuan sawifiahin mock exercise a nih angin a tak taka thil thleng thei entirna tur a ni naa, mipui te chiaina lo turin a chah.

Pu Udit Prakash Rai chuan, Mizoram chu lirnghing nasa tak thlen theihna Seismic Zone 5 atangin lirnghing raphlak tak thlen theihna, fimkhur leh inpuahchah ngai Seismic Zone 6 ah dah thar a ni a ti a, sorkar mai ni lo mimal, chhungkua leh khawtlang pawh lirnghing na tak mai lo thleng palh thei laka inpuahchah a ngaih thu a sawi.

Sorkar laipua National Disaster Management Authority leh Mizoram a State Disaster Management Authority leh District tina District Disaster Management Authority te chuan State Level Mock Exercise on Earthquake Disaster hi naktukah District tin khawpuia hmun thlan bikah te neih a nih dawn thu DMR hotute chuan an sawi a; hei hi nasa taka Mizoram rawn sawi nghing a, chhiatna rawn thlen thei chungchanga fimkhur tulzia leh inpuahchah dan tur mipui inzirtir na tur leh, chhiatna thleng thei hmachhawn tura inpuahchahna tuaihriam nan leh, chhiatna lo thlen palha hmachhawn dan thiam na tur bakah chhiatna kaihhnawh department hrang hrang ten an hmanrua theuh an hman thiam leh thiam loh en nan leh an tih tur theuhthe an chian leh zual nan te, midangte nen a thawhho that leh zual nan leh hmasawn an ngaihna laite hriat chhuah a nih theih na atana tih a ni, an ti bawk.

DMR hotute chuan mock drill-ah chuan chawhma dar 10-ah DC ten siren an ti ri dawn a, chawhma lama drill chu chhun dar 12 vel thleng a nih dawn an ti a, tlai lamah district tina hmun thlan bikah dar 4-6 thleng neih leh a ni dawn an ti a. Lirngching palh thei hre chung a chet lak dan enchainna a ni tih hriaa chia lo turin mipui an ngen a, thudik lo vawrh darh lo tur leh Mizo mipui zawng zawng tana tangkai leh tha tur a nih avangin mipui hriathiamna, tawiawmna leh thawhpaina an ngen nghal bawk a ni.



DAMPA MLA

Dampa bialtu MLA Dr.R.Lalthangliana, MNF Senior Vice President ni bawk chuan Phuldungsei leh West Phaileng PHC-ah Doctor indaihlona ngaihven turin sorkar a ngen tih a sawi a,

Tun dinhmunah an indaihlona chhan chu Doctor-ten zirna sang zawk an beihna vang ni mahse; mipuiin Doctor bik kher chu an mamawhna a nasatzia leh mangan thu min hrilh a, sorkar pawh a rang lama ngaihven thuai turin a phut a ti.

Dr Lalthangliana hian a bial Phuldungsei Veng chung, Pukzing Vengthar, Hruiduk, Marpara-a tlawhin heng khuaah te hian VC, YMA, MHIP, MUP, sorkar hnathawk awm remchang leh MNF party hruaituten an pawl mamawh leh khawtlang mamawh hrang hrangte an lo thlen a, bialtu MLA pawhin a tul ang leh, a theih ang anga hmalakpui a tum thu a sawi.

Dr.R.Lalthangliana hian Phuldungsei PHC tlawh nghalin thawktuten an lo dawngsawng a, nikum December atanga Doctor an neih tawh loh thu leh hospital mamawh hrang hrangte chu bialtu MLA hnenah an lo thlen a. Bialtu MLA pawhin Doctor neih loh tawp chu thil serious tak a ni tiin, ngaih pawimawh a tul thu a sawi a. Theih ang angin an mamawh an thlente chu bawhzuisk a tum thu a sawi.



MSSC VOLLEYBALL/BASKETBALL COURT INAUGURATION

District Council & Minority Affairs Minister Pu C. Lalsawivungan nimin khan Mizoram State Sports Council (MSSC) buatsaih, Lunglei, Lawngtlai leh Mamit District-a Ministry of Minority Affairs hnuai Pradhan Mantri Jan Vikas Karyakram (PMJVK) kaltlanga basketball court 24 leh volleyball court 18 sakte a hawng.

Hawna thusawiin Pu C. Lalsawivunga chuan PMJVK chu hmasawna ruhrel dinna atana Central Scheme pawimawh a nih thu leh sawrkarin zau zawka ngaihtuahna neiin, health leh education sector leh a dangah tangkai taka hman tumin ke a pen chho mek tih a sawi a. Sports bungrua leh hmunhma, tha leh zung, ngaihtuahna tam tak bakah cheng tam tak senga siam leh sakte chu duat leh uluk taka enkawl a ngaih thu leh he'ng venhim kawngah hian a awmna khawtlangte'n mawhphurhna sang tak an neih thu a sawi.

Kum 2020-2021 khan Ministry of Minority Affairs hnuai Pradhan Mantri Jan Vikas Karyakram (PMJVK) Scheme atangin Basketball Court with Viewing Gallery leh Volleyball Court with Viewing Gallery siamna atan approval hmuh a ni a. March ni 22, 2022 khan Expenditure Sanction hmuh niin, heng project-te hi district pathum - Lunglei, Lawngtlai leh Mamit District-ah thawh a ni a. Tender chhuah a nih hnuah

he hna thawk tur hian M/s Junior Consultancy Services, Tlangnuam, Aizawl, Mizoram chu thlan a ni.

<><><>

VAPHAI

Vaphai khawtlang hruaitute leh MZI Hqrs. Champhai tangkawpin nimin khan Thlangtlak mual, Zokhua-ah Cultural Meet & Thalfavang Kut an hmang a, Pu Lalzara, Champhai District Information Officer chu khuallian niin he hun hi a hmanpui.

Thu sawiin Pu Lalzara chuan Zai leh rimawi thatna te tarlangin Mizo leh Kristian kan ni tih tilangtu a niin kan hnam inpumkhatna leh inpawlhona siamtu thil tangkai tak a ni a ti a. Zai hi eizawna tlak a ni tawh tih tarlangin zaithiam te chu tan la a hmasawn zel tum turin a fuih a.MZI ten zai mite chawisanna tur leh Mizo hnam zai leh nunzemawi humhalhna tura an hnathawh chu fakian an tih leh zelna turah duhsakna a hlan.

He hunah hian Vaphai khuaa YMA, YMA Chhang, MHIP, Zirlai te leh Champhai atanga zai mi ten hnam zai leh lam hmangin mipui an awi.

Nizan khan Vaphai Lal mual- ah Cancer vei mekte pualin Champhai MZI Hqrs.in Charity Concert an buatsaih nghal a ni.

<><><>

SUPPLY MINISTER

Food Civil Supply & Consumers Affairs Minister Pu B. Lalchhanzova chuan, Gas Pipe hmanga Tripura atanga Mizorama Natural gas thlunzawm hna thawh mekte endikin Agartala a tlawh a; Tripura Natural Gas Corporation Limited hotute nen nimin khan inkawmin Tripura-a Natural gas hmanngu Industry lian PRAN Beverages (India) Pvt. Ltd., Tripura Industrial Growth Centre, CNG Station leh ONGC hmunpuite a tlawh kual a; eirawngbawl nana natural gas hmanngu pipeline connection 330 awmna Subham Solitaire a tlawh bawk.

Minister chuan Project a hlawhtlin ngei theih nan leh a hun taka thawh zawh a nih theih nan hnathawktute chu uluk leh thahnemngai taka thawk tura chahin duhsakna a hlan a; IGCL leh TNGCL hotute pawhin Mizoram sawrkarin an phurpuinaah lawmthu an sawi ve bawk a ni.

Natural Gas Pipeline hi Panisagar Terminal, Tripura atanga intan niin Sihhmui, Mizoram-ah Receiving Terminal bun a ni dawn a. Panisagar leh Sihhmui inkar pipe thui zawng hi Km 119.5 niin Pipe diameter hi feet 1 a ni a, leimin leh shock laka him tur pipe hman niin pipeline hian Kanhmun, Zawlnuam, Kawrthah, Tuidam, Darlak, Mamit, Lengte te a paltlang dawn a; Panisagar - Sihhmui inkara Pipe phum hna hi Indradhanush Gas Grid Limited (IGCL) ten thawkin, Sihhmui Terminal atanga Aizawl khawpui chhunga gas sem darh leh enkawlzui hna chu Tripura Natural Gas Corporation Limited (TNGCL) ten an chang ve thung dawn a ni. Aizawl khawpui bakah hian Mizoram hmun hrang hrangah a tahtawla la semdarh zel tura ruahman a ni bawk.

He Tripura - Mizoram Gas Pipeline Project hi North East Natural Gas Pipeline Grid hnuaia mi niin, kum 2027 December thla velah thawh zawh hman beisei a ni a, tun dinhmunah zaa 45 vel thawh zawh tawh a nih thu IGCL hotute chuan an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



ADCC

Aizawl District Congress Committee (ADCC) hruaitute chuan nimin khan Aizawl Press Club-ah thuthar thehdarhtute kawmin, BJP sorkarin MGNREGA thlak nana G-RAM-G a kalpui chu tha lo an tih thu leh angai anga kalpui leh an duh thu an sawi.

ADCC President Pu Lalhmingthanga Pachuau chuan MGNREGA hi kum 2006 a hman tan anih atangin ni vbc 180 chuang inhlawhna siam a ni tawh a, chhungkaw vbc 4 point 6 in an chhawr tawh a, kawng leh tuizem vbc 10 chuang siam a ni tawh an ti a, kum 20 chhung India rama thingtlang mite inngahna MGNREGA tihtawp a nita chu pawian tih thu a sawi.

MGNREGA chu CAG Audit telin zirchianna vawi 200 chuang paltlang tawh a nih thu leh project hlawhtling leh nghawng nei tha ber zinga mi a ni tih hmuhchhuah a nih thu Pu Lalhmingthanga chuan a sawi a, heivang hian Modi-a sorkar hian tihtawp an duh hle a ni tih an thiltih hian a ti lang a ni, a ti bawk.

Pu Lalhmingthanga chuan Modi sorkar chuan dan anga inhlawhna Central sorkarin a pek chu an ti tawpin kuthnathawktute tana inngahna tha tak chu a tihtawp sak ta tih sawiin, MGNREGA a tawp chuan hnathawh tur nei lo an pung dawn an ti a, mipuite chu minimum wages hlawh pha loa chhawr an ni dawn tih sawiin khawsak harsat avanga khawpuia pemlut a titam hle dawn tih sawiin Panchayat leh VC ten thuneihna an hloh dawn niin a sawi.

Congress hian MGNREGA Bachao Sangram tia vuahin thil phut pali an nei a, heng zingah hian Langtlang taka kalpui leh

MGNREGA thlak lova a ngai anga kalpui leh Constitution in a pek anga inhlawh theihna chanvo peklet bakah Ram pumah minimum wages atan Rs 400 hman te a ni.



PM ON FARMERS

Prime Minister Narendra Modia chuan buhseng kut Pongal te ang chuan ramchhunga inunauna leh inpumpkhatna a ti nghet a ti.

Nimina New Delhi-a Union Minister of State for I&B Dr.L.Murugana chenna ina Pongal lawmnaah telin Prime Minister Modia chuan sawrkar laipuiin loneitute dawmkang turin theithawp a chhuah a ti a. An dinhmun siamthatna turin chhum lo chat loin a thawk reng a ni a ti bawk.

Pongal chungchang sawiin PM Modia chuan khuanu thilsiamte nena inrem taka chhungkua leh khawtlang an khawsak hona kawng a ni a ti a. Tamil hnamte nunphung leh nungchate chu inhne hnai tak an ni a ti a. Ramchhung hmun dangah pawh Pongal ang tho hian Lohri, Makar Sankranti, Magh Bihu leh kut dangte hman ve anih thu sawiin heng Kut te hian hnam inpumkhatna leh inunauna a ti nghet a ni a ti bawk.



IRAN

India chuan Irana khawsa mek India mi zawng zawngte chu a theih ang anga Iran chhuahsan turin thurawn a pe. Iran ah hian sawrkar laka lungawilohna boruak a sosang zel a, venhimna dinhmun pawh a derthawng tawh hle nia thudawn a ni a. Zirlai, sakhaw biakzina kal, sumdawng, khualzin leh India mi Iran-a la cham te chu a remchan dana chhuahsan vek tura thurawn pek an ni a. External Affairs Ministry chuan Iran-ah hian India mite zin hrih lo turin a chah bawk a ni.

Nimin khan Iran Foreign Minister Aeyed Abbas Araghchi chuan External Affairs Minister Dr. S.Jaishankar chu phone in a rawn bia a. Pu Jaishankar-a sawidanin hruaitu pahnihte hian Iran boruak inmung chho mek leh a chhehvel an sawidun niin social media lamah a tarlang a ni. Hetihlai hian Iran-a Human rightst group te chuan rampum huapa sawrkar laka lungawilohna lantir anih hnuah mi 2600 chuang an thi tawh a. Iran mi tam takin ramri kanin Trukiye an lut tawh bawk a ni. US President Donald Trump chuan tanpuina an pe thuai dawn tih sawiin US chuan lungawilohna lantirte zingah tihlum an awm chuan na taka a chhanlet tur thu a sawi a.

Iran pawhin an thenawm ram zingah US sipai lo mikhualte chu na taka a do let tur thu a sawi a ni. China chuan Iran ramchhung buaina a reh a, muann a awm theih nan a thlawp zel dawn a ti. Chines Foreign Ministry thupuangtu Lin Jian chuan he thu hi sawiin Iran ramchhung buainaah ramdang an inrawlh leh tharum hmanga vau chu a dodal tlat a ti a. Tunhnaia US President Donald Trump-an Iran nena sumdawna ti mek ramte lakah chhiah hmanga hrekna a lek tur a sawi chu chhangletin Pu Lin-a chuan China chuan insumdawntawnaa chhiah awm mek chu tihdanglam loh a duh a ti a. Tariff hmanga indona chu tuman an hlawkpui lo tih sawiin China chuan a tana tha leh dan hmanga a chanvo leh thuneihnate nghet takin a hum tlat dawn tih a sawi bawk a ni.

Hetihlai hian United Nations-a Iran Palai chaun UN Security Council leh UN Secretary-General te hnenah zualkoin US in tharum hmangin a vau niin a puh a. Iran tualchhung buainaah US chu a inrawlh thu leh sipai tha chakna hmanga beiha a vau a ti a. US in a ngaihdan a sawi chhuah chu khawvel dan kalh anih thu leh UN Charter in khapna te bawhchhiatnaah Tehran chuan a ngai tih a sawi bawk a ni.

